



Boletín Nº 225. Martes, 28 de setembro de 2004

- IV. ADMINISTRACIÓN LOCAL - IV.2 MUNICIPAL - SADA

ANUNCIO Pág. 9188 Reg. 10345-x.

◀ Anterior

Siguiente ▶

Aprobación definitiva do Regulamento de honras e distincións

Exposto ao público o acordo inicial, adoptado polo Pleno da Corporación municipal deste Concello na sesión ordinaria realizada o día 30 de abril de 2004, de aprobación do Regulamento especial de honras e distincións, sen que se presentasen reclamacións, o acordo inicial quedou elevado automaticamente a definitivo polo que se procede á publicación íntegra do Regulamento.

REGULAMENTO ESPECIAL DE HONRAS E DISTINCIÓNS DO CONCELLO DE SADA

CAPÍTULO I

Obxecto

Artigo 1º

O presente Regulamento ten por obxecto a regulación dos distintivos e nomeamentos honoríficos encamiñados a premiar especiais merecementos, beneficios sinalados, servizos extraordinarios, calidades e circunstancias singulares que concorran nos galardoados, persoas físicas ou xurídicas, a tenor do establecido nos artigos 189 a 191 do Real Decreto 2.568/1986, de 28 de novembro.

Artigo 2º

Todas as distincións a que fai referencia este Regulamento teñen carácter honorífico, sen que, por tanto, outorguen ningún dereito administrativo nin de carácter económico.

CAPÍTULO II

Clases de honras e distincións

Artigo 3º

As honras que o Concello de Sada poderá conferir para premiar especiais merecementos ou servicios extraordinarios prestados ao Municipio serán os seguintes:

- 1.-Fillo predilecto de Sada.
- 2.-Fillo adoptivo de Sada.
- 3.- Fillo distinguido de Sada.
- 4.- Visitante distinguido.
- 5.-Membro honorario da Corporación.
- 6.-Medalla do Municipio de Sada nas categorías de ouro e prata.
- 7.-Designación de vías públicas, complexos urbanos ou instalacións públicas co nome dunha persoa vinculada ao Municipio.

Artigo 4º

A concesión das distincións honoríficas expresadas deberá ir precedida do cumprimento das normas establecidas no presente regulamento.

CAPÍTULO III

Títulos de fillo predilecto e de fillo adoptivo

Artigo 5º

1.- A concesión do título de fillo predilecto de Sada só poderá recaer en quen, tendo nacido no Municipio destacase de forma extraordinaria por cualidades ou méritos prestados en beneficio e honra de Sada que acadaran consideración indiscutible no concepto público.

2.- A concesión do título de fillo adoptivo de Sada poderá outorgarse ás persoas que, sen ter nacido no Municipio, reúnan as circunstancias sinaladas no parágrafo anterior.

3.- Tanto o título de fillo predilecto como o de fillo adoptivo poderán ser concedidas a título póstumo.

Artigo 6º

1.- Os títulos de fillo predilecto e adoptivo, ambos de igual rango, constitúen a maior distinción do Concello pola que a súa concesión se fará sempre utilizando criterios moi restrictivos.

2.- Os títulos anteriores terán carácter vitalicio e, unha vez outorgados tres para cada un deles, non poderán conferirse outros mentres vivan as persoas favorecidas, a menos que se trate dun caso moi excepcional, a xuízo da Corporación, que haberá de declarar esa excepcionalidade previamente en sesión plenaria e por maioría de dous tercios.

Artigo 7º

1.- A concesión dos títulos de fillo predilecto e de fillo adoptivo será acordada polo Pleno da Corporación municipal co voto favorable da maioría absoluta dos membros que a compoñen, a proposta do Alcalde e previo expediente no que deberán quedar acreditados os merecementos que xustifiquen estas honras.

2.- Acordada a concesión de calquera dos dous títulos anteriores, a Corporación municipal sinalará a data en que se reunirá para facer entrega ao agraciado en sesión solemne do diploma e das insignias que acrediten a distinción.

3.- O expresado diploma deberá estenderse nun pergamiño artístico e conterá de maneira moi sucinta os merecementos que xustifican a concesión. A insignia axustarase ao modelo que no seu día aprobe a Alcaldía, no que deberá figurar en todo caso, o escudo do municipio, así como a inscrición de fillo predilecto ou fillo adoptivo, segundo proceda.

Artigo 8º

As persoas ás que se conceda os títulos de fillo predilecto ou fillo adoptivo do municipio terán dereito a acompañar á Corporación municipal nos actos ou solemnidades a que esta concorra, ocupando o lugar que para iso lle está sinalado. A tal efecto, o Alcalde dirixirá aos interesados unha comunicación oficial nas que se lles indique o lugar, data e hora da celebración do acto ou solemnidade participándolles a invitación a asistir.

CAPITULO IV

Títulos de fillo distinguido e de visitante distinguido

Artigo 9º

1.- A concesión do título de fillo distinguido de Sada só poderá recaer nas persoas que, tendo nacido no Municipio, enaltecesen o nome de Sada polas súas cualidades humanas ou pola súa traxectoria persoal, profesional, artística ou laboral, ben residan no Municipio ou ben estean na emigración.

2.- A concesión do título de visitante distinguido de Sada poderá outorgarse ás personalidades españolas ou estranxeiras que visiten o Municipio, e merezan especial consideración polas altas responsabilidades que exerzan.

3.- Tanto o título de fillo distinguido como o de visitante distinguido serán concedidos por decreto a Alcaldía, e se materializarán na entrega de diploma ou pergamiño.

CAPITULO V

Nomeamento do membro honorario da Corporación

Artigo 10º

1.- O nomeamento de Alcalde ou concelleiro honorario do Concello de Sada poderá ser outorgado por este a personalidades españolas ou estranxeiras, xa como mostra da alta consideración que lle merecen, xa como correspondencia a distincións análogas de que fosen obxecto a Corporación ou autoridades municipais. Para os conceder a estranxeiros requirirase autorización expresa do Ministerio para as Administracións Públicas, previo informe de Asuntos Exteriores.

2.- Non poderán outorgarse novos nomeamentos dos expresados no número anterior, mentres vivan tres persoas que sexan alcaldes honorarios ou seis que recibisen o título de concelleiro honorario.

Artigo 11º

1.- A concesión destes títulos honoríficos será acordada pola Corporación Municipal co voto favorable da maioría absoluta dos membros que a compoñen, a proposta razoado do Alcalde. Poderá facerse con carácter vitalicio ou por prazo limitado, polo período que corresponda ao cargo de que se trate.

2.- Acordada a concesión destas distincións, procederase na forma que dispoñen os números 2 e 3 do artigo 70 para a entrega ao premiado de diploma e insignias, que neste caso consistirán nunha medalla idéntica á que usa o Alcalde ou os Concelleiros, segundo o caso.

Artigo 12º

1.- As persoas ás que se conceda estes nomeamentos non terán ningunha facultade para intervir no goberno nin administración municipal, se ben o Alcalde poderá encomendarlles funcións representativas cando haxan de se exercer fora do término municipal.

2.- Nos demais actos oficiais que celebre o Concello ocuparán o lugar preferente que a Corporación municipal lles sinale e asistirán a eles ostentando a medalla acreditativa da honra recibida.

CAPÍTULO VI

Medallas do Municipio

Artigo 13º

1.- A medalla de Sada é unha recompensa municipal creada para premiar méritos extraordinarios que concorran en personalidades, entidades ou corporacións, tanto nacionais como estranxeiras, por ter prestado servicios ao Municipio ou dispensado honras ao mesmo. Respecto ás persoas físicas, poderán ser concedidas tamén a título póstumo.

2.- A medalla terá o carácter de condecoración, establecéndose dúas categorías, ouro e prata.

Artigo 14º

1.- As medallas de ouro e prata serán cuñadas no correspondente metal e todas penderán dunha fita de seda de cor azul, con pasador do mesmo metal que a medalla outorgada. Cando se trate de algunha entidade ou corporación, a fita

será substituída por unha gravata da mesma cor, para que pode ser enlazada á bandeira ou insignia que haxa de a ostentar .

2.- Para determinar en cada caso a procedencia da concesión e a categoría da medalla a outorgar, deberá terse en conta a índole dos méritos e servicios, a transcendencia da labor realizada en beneficio e honra do municipio, e as particulares circunstancias da persoa proposta para a condecoración, prevalecendo sempre a calidade dos merecementos sobre o número dos mesmos.

Artigo 15º

A concesión das medallas será acordada polo Pleno do Concello co voto favorable da maioría absoluta dos membros que o compoñen, a proposta razoada do Alcalde.

Artigo 16º

As condecoracións outorgadas serán obxecto dun acto solemne de entrega do correspondente diploma estendido en pergamiño artístico, contendo de maneira moi sucinta os merecementos que xustifican a concesión e da medalla concedida.

CAPÍTULO VII

Designación de vías ou instalacións públicas.

Artigo 17º

O Pleno da Corporación poderá designar unha vía pública, complexo urbano, ou instalación municipal co nome dunha persoa vinculada ao Municipio, recoñecendo con iso especiais merecementos.

A designación requirirá a maioría simple dos concelleiros que concorran á sesión.

CAPÍTULO VIII

Do procedemento

Artigo 18º

1.- A concesión de calquera das honras a que se refire este regulamento requirirá a instrucción previa do oportuno expediente, que sirva para determinar os méritos, cualidades e ou circunstancias singulares que concorran nos galardoados, e que serán aplicados co maior rigor.

2.- A iniciación do procedemento farase por decreto do Alcalde-Presidente, ben por propia iniciativa ou a requirimento dunha terceira parte dos membros que integran a corporación ou respondendo á petición razoada dun organismo oficial ou de entidade ou asociación de recoñecida solvencia.

3.- No decreto da Alcaldía designarase de entre os concelleiros un instructor, que se ocupará da tramitación do expediente.

Artigo 19º

1.- O instructor practicará cantas dilixencias estime necesarias para investigar os méritos do proposto, solicitando informe e recibindo declaración de cantas persoas ou representantes de entidades podan subministrar datos, antecedentes ou referencias que conduzan ao esclarecemento de aqueles.

2.- Acabada a práctica de cantas dilixencias fosen acordadas, o instructor formulará proposta motivada, que elevará á Comisión Informativa competente no seu caso, para que esta, co seu díctame, o remita á Alcaldía.

3.- O Alcalde-Presidente, á vista do díctame da comisión, poderá acordar a ampliación de dilixencias ou aceptar plenamente o díctame e nun e noutro caso someter por escrito razoado ao Pleno do Concello o expediente, para que adopte a resolución que estime procedente, na forma que dispón este regulamento.

Artigo 20º

1.- Un extracto dos acordos da Corporación outorgando calquera das honras citados deberá inscribirse nun libro-rexistro, que estará a cargo do titular da Secretaría do Concello. O libro-rexistro estará dividido en sete seccións, unha para cada unha das recompensas honoríficas establecidas neste regulamento.

2.- En cada unha das seccións anteriores inscribíranse, por orde cronolóxico de concesión, os nomes e circunstancias persoais de cada un dos favorecidos, a relación de méritos que motivaron a concesión, a data de esta e, no seu caso, o do seu falecemento.

Artigo 21º

As honras, distincións e nomeamentos concedidos serán entregados no Salón de Sesións do Concello, con asistencia do Pleno da Corporación e aquelas autoridades e representacións que se estimen pertinentes, atendidas as circunstancias de cada caso.

Artigo 22º

O Concello poderá privar das distincións que son obxecto deste regulamento, coa conseguinte cancelación do asento no libro-rexistro, calquera que sexa a data en que fosen conferidas, a quen incorra en faltas que aconsellan esta medida extrema. O acordo da Corporación no que se adopte esta medida irá precedido do correspondente expediente cos mesmos trámites e requisitos que para o seu outorgamento, e requirirá o mesmo número de votos que foi necesario para outorgar a distinción de que se trate.

Artigo 23º

As honras que a Corporación poda outorgar ao Rei non requirirán outro procedemento que a previa consulta á Casa da Súa Maxestade, e en ningún caso se incluirán no cómputo numérico que como limitación establece o presente regulamento.

Disposición final

O presente Regulamento, que consta de vintetrés artigos e unha disposición final, entrará en vigor logo de que se publique enteiramente o seu texto no Boletín Oficial da Provincia e transcorra o prazo de quince días a que se refiren os artigos 70.2 e 65.2 da Lei 7/1985, do 2 de abril, Reguladora das Bases de Réxime Local.

Sada, 16 de setembro de 2004

O Alcalde

Asdo.: Ramón Rodríguez Ares

Reg. 10345-x

